

**TEKS UCAPAN**  
**DATO' PROF. DR. ZUL AZHAR ZAHID JAMAL**  
**NAIB CANSOLOR**  
**UNIVERSITI MALAYSIA PERLIS**  
**SEMPENA SAMBUTAN MAAL HIJRAH UniMAP**  
**PADA 5 OKTOBER 2018**  
**DI KECEMERLANGAN, KAMPUS ALAM UniMAP, PAUH PUTRA.**

Assalamualaikum Warahmatullahi Wabarakatuh

Salam Sayangi Negaraku

Salam Ilmu, Keikhlasan, Kecemerlangan UniMAP

**SALUTASI**

Yang Berbahagia Timbalan - timbalan Naib Canselor UniMAP

Yang Berusaha Pegawai -Pegawai Utama Universiti

Yang Berbahagia Prof. Madya Dr. Shuhairimi Abdullah

Pengarah Pusat Islam UniMAP

Dekan-dekan dan Ketua-ketua Jabatan,

Seterusnya Para Pelajar dan staf Universiti Malaysia Perlis yang saya kasihi sekalian.

**KATA ALU-ALUAN**

1. Alhamdulillah, bersyukur kita ke hadrat Allah Aza Wajalla kerana memberi kesempatan kita untuk bersama-sama berada pada Majlis Sambutan Maal Hijrah peringkat UniMAP 1440 Hijrah di pagi yang barakah ini.

2. Selawat dan salam kepada junjungan besar Nabi Muhammad SAW penghulu segala Rasul, pembawa rahmat sekalian alam.
3. Terlebih dulu ingin saya mengucapkan setinggi-tinggi syabas dan tahniah kepada kepada semua jawatankuasa majlis terutama Pusat Islam UniMAP yang telah bertungkus lumus memastikan program kita berjalan lancar. Semoga Allah menerima penat lelah kalian sebagai ibadat yang dilakukan semata-mata kerana Dia jua.

Hadirin dan hadirat sekalian,

### HIJRAH

4. Alhamdulillah, kita berjaya menganjurkan Majlis Sambutan Maal Hijrah Peringkat UniMAP 1440 Hijrah / 2018 Masihi buat kali kedua pada tahun ini.
5. Seperti yang kita sedia maklum, pengertian Hijrah membawa makna yang sangat besar dalam kehidupan kita dan peristiwa hijrah itu sendiri merupakan titik tolak kepada transformasi umat manusia di mana kita perlu sentiasa mengambil iktibar dan dilaksana ke arah melakar kecemerlangan dunia dan akhirat.
6. “Menyantuni Umat Membawa Rahmat” dari tema ini dapat kita jelaskan bahawa sebagai sebuah institusi pendidikan tinggi, UniMAP mempunyai amanah dan tanggungjawab yang besar terhadap masyarakat.
7. Oleh itu, kita perlu merancang dan melaksanakan program pembangunan untuk memenuhi keperluan asas masyarakat, tidak mengira bangsa dan agama, lebih-lebih lagi mereka yang hidup dalam kesusahan.
8. Maka dalam menyantuni kepelbagaian masyarakat hari ini, kita perlu memahami kekuatan dan kelemahan masing-masing dan menyantuni mereka dengan jiwa muafakat dan toleransi yang tinggi. Setiap manusia berhak untuk disantuni walaupun berbeza fahaman dan pegangan. Kesejahteraan negara menuntut keikhlasan dan komitmen kita dalam

memastikan semangat perpaduan dan kesefahaman terus segar. Bahkan ia dibina di atas landasan kesederhanaan, kesantunan dan kesatuan dengan satu matlamat ke arah kemajuan dan pembangunan seimbang.

9. Disebabkan inilah UniMAP terus komited dalam melaksanakan tanggungjawab sosial korporatnya (CSR). Kita berkongsi segala kepakaran yang ada bukan saja untuk masyarakat Perlis, malahan seluruh Malaysia. Apa yang kita lakukan ini adalah bagi mewujudkan perasaan saling membantu dan berkongsi kasih sayang, selain keperluan iman dan ilmu di kalangan masyarakat, yang juga hak kemanusiaan.
10. Dalam pada masa yang sama juga UniMAP turut membantu dalam memastikan pelajar yang kurang berkemampuan mendapat pendidikan yang sebaiknya dengan menganjurkan program-program untuk mereka.
11. Namun begitu, kita tidak harus berbangga dan selesa dengan apa yang kita lakukan ini, kita semua ada tanggungjawab untuk dilaksanakan, antara tanggungjawab tersebut ialah membangunkan umat Islam untuk maju dan berjaya.
12. Kunci utamanya ialah dengan melaksanakan kehidupan menurut Al-Quran dan Sunnah sepertimana yang telah dipimpin oleh Rasulullah S.A.W.

Hadirin dan hadirat sekalian,

### **PENUTUP**

13. Sebelum mengakhiri ucapan, saya ingin merakamkan setinggi-tinggi tahniah kepada semua penerima anugerah, semoga penganugerahan ini meninggalkan kenangan yang amat bermakna buat semua sepanjang berada di UniMAP ini.
14. Tidak dilupakan juga kepada semua jawatankuasa yang terlibat setinggi-tinggi syabas dan tahniah di atas kelancaran penganjuran Sambutan Maal Hijrah pada kali ini.

15. Akhir kata, sekali lagi saya menyeru kepada semua warga UniMAP untuk menggandakan lagi usaha dalam pekerjaan kita, kerana kerja itu merupakan amanah dan ibadah yang besar tanggungjawabnya kepada kita semua.

Dengan lafaz Bismillahirrahmanirrahim saya dengan rasa sukacitanya merasmikan ***Sambutan Maal Hijrah Peringkat UniMAP 1440 Hijrah/2018 Masihi.***

Sekian, Wabillahitaufik Walhidayah Wassalamualaikum Warahmatullahi Wabarakatuh.